

आकाशवाणी

- पहलगाम आतंकी हमले दे बाद आतंकवाद खलाफ चलाए गेदे “आप्रेसन सिंदूर” बारे जानकारी देने लेई बनाए गेदे 7 शिष्टमंडलें दा पहला दल अज्ज 4 देशें दे दौरें पर खाना होआरदा ऐ।
- प्रधानमंत्री नरेंद्र मोदी होरें जर्मनी दे नमें चांसलर फेडरिक मर्ज हुंदे नै गल्लबात कीती। दौनें मुखें आतंकवाद गी दना बर्दाश्त नेई करने ते एहदा किट्ठे रलिये मकाबला करने दा प्रण पाया।
- दिल्ली मंत्रिमंडल नै 3 किलोवाट दे रूफटॉप सोलर पैनल स्थापित करने लेई 30 जहार रपे दी सब्सिडी दी मंजूरी देई दिती ऐ।
- मध्य प्रदेश सरकार नै इंदौर, भोपाल, उज्जैन, जबलपुर ते ग्वालियर गी महानगरीय क्षेत्र दे रूपे च विकसित करने दे प्रस्ताव गी मंजूरी देई दिती ऐ।
- अमरकी राष्ट्रपति डोनाल्ड ट्रम्प होरें अपने देसै दी ब्हाई सुरक्षा लेई 175 अरब डालर दी लागत आहली गोल्डन डोम रक्षा प्रणाल दी घोषणा कीती ऐ।
- आई.एस.एस.एफ जूनियर विश्व कप दी 50 मीटर राइफल प्रोन च भारत दे एड्रियन करमाकर नै चांदी दा तगमा हासिल कीता ऐ।

First-Delegation

पहलगाम आतंकी हमले मगरा आतंकवाद दे खिलाफ आप्रेशन सिंदूर उप्पर भारत दे राजनयिक कुल संसारी संपर्क लेई गठित 7 सर्वदलीय शिष्टमंडल शा पैहला शिष्टमंडल अज्ज चार मुखें लेई रवाना होआरदा ऐ। शिवसेना दे सांसद श्रीकांत शिंदे हुंदे नेतृत्व च एह प्रतिनिधिमंडल संयुक्त अरब अमीरात, लाइबेरिया, कांगो ते सियरा-लियोन जाग। जनता दल यूनाइटेड दे सांसद संजय झा ते डएमके पार्टी सांसद कनिमाझी करुणानिधि हुंदे नेतृत्व च दो प्रतिनिधिमंडल कल इंडोनेशिया, मलेशिया, कोरिया, जपान, सिंगापुर ते स्पेन, यूनान, स्लोवेनिया, लातविया ते रूस लेई रवाना होडन। एह बहुदलीय प्रतिनिधिमंडल आतंकवाद गी कदें बी बर्दाश्त नेई करने दी भारत दी नीति तैहत एहदे शा निब्बड़ने दी राष्ट्री प्रतिबद्धता ते पक्के निश्चे गी दुनिया दे सामने रक्खोग। विदेश सचिव विक्रम मिसरी होरें कल नमीं दिल्ली च संसद भवन च इनें त्रौनें शिष्टमंडलें दे सदस्यें गी भारत दे कूटनीतिक नजरिये दी जानकारी दिती। बैठक मगरा मीडिया कन्नै गल्ल करदे होई श्रीकांत शिंदे होरें गलाया जे प्रतिनिधिमंडल दे सदस्यें गी भारत च होए दे पिछले आतंकी हमले दी जानकारी दे कन्नै एह बी दस्सेआ गेआ जे पाकिस्तान किस चाल्ली बन्ने पार थमां आतंकवाद गी बढ़ावा दिंदा आरदा ऐ।

<><><><><><>

PM-German-Chancellor

प्रधानमंत्री नरेंद्र मोदी हों कल संझा जर्मनी दे चांसलर फ्रेडरिक मर्ज हुंदे नै फोन पर गल्लबात कीती ते उनेंगी ओहदा साम्भने पर ममारकबाद दिती। गल्लबात दौरान दवे नेताएं भारत ते जर्मनी बश्कार राजनैतिक सांझेदारी गी होर निग्गर बनाने दे कन्नोकन्नी आतंकवाद दा किट्ठे रलियै मकाबला करने दा अपना धेड़या बी पक्का कीता। विदेश मंत्रालय आसेआ जारी इक बयानै च आखेआ गोआ ऐ जे दौनें मुखे आतंकबाद गी कुसै बी सूरतै च उक्का बर्दाश्त नेई करने दी बचनबद्धता बी पक्की कीती। दौनें नेताएं पिछले 25एं बरें च भारत जर्मन रणनीतिक सांझ भ्याली च शानदार प्रगति गी ध्यानै च रखदे होई बपार, रास-पूंजी, रक्षा, सुरक्षा, नवाचार ते प्रौद्योगिकी दे खेतरै सने दपक्खी सरबंघें गी निग्गर बनाने पर बी सहमति जताई। मोदी हों चांसलर मर्ज हों गी भारत औने दा बी साद्दा दिता ते जर्मनी च रवा करदे भारतीय मूल दे लोकें दे योगदान दी बी सराहना कीती।

<><><><><><>

Delhi

दिल्ली कैबिनेट नै छत्तें उप्पर लग्गने आहले 3 किलोवाट दे सोलर पैनल लाने लेई 30 जहार रपे दी सब्सिडी दी मंजूरी देई दिती ऐ। एह फैसला कल मुखमंत्री रेखा गुप्ता हुंदी अध्यक्षता च होई दी कैबिनेट दी बैठक च लैता गोआ। उनें

गलाया जे एह फैसला पी.एम सूर्य घर योजना तैहत केंद्र सरकार दी 78 जहार रपे दी सब्सिडी दा पूरक ऐ।

<><><><><><>

Beating-Retreat

अटारी बाघा बार्डर आहली सांझी चेक पोस्ट पर आम लोक अज्जै थमां बीटिंग रिट्रीट समारोह दिक्खी सकंगन। पहलगाम आतंकी हमले दे बाद भारत आसेआ पाकिस्तान ते पाकस्तिन दे नजैज कब्जे आहले जम्मू-कश्मीर दे किश इलाकें च आतंकी संगठनें दे ठकानें ते आतंकवादिएं दे सिखलाई कैंपें पर कीती गेदी कार्रवाई आप्रेशन सिंदूर दे बाद बनी दी तनोतनी आहली स्थिति दे चलदे 8 मई थमां सीमा चौकिएं पर इस चाल्ली दी औपचारिक परेड रोकी दिती गई ही ते हून कल्लै थमां इसी परतियै शुरू करी दिता गेआ ऐ। कल उआं एहदे च छड़ा मीडिया आहलें गी गै सददे दा हा। अटारी बाघा दे अलावा 2 होर चौकिएं जिंदे च फिरोजपुर च हुसैनीवाला ते फाजिलका च सदकी चौकी शामिल ऐ, उत्थे बी अज्ज शामी कोला आम लोक बीटिंग रिट्रीट दिक्खी सकडन। इस परेड च सुरक्षा दे लिहाज कन्नै किश जरूरी एहतियाती उपा बी कीते गेदे न। पहले परेड लेई बन्ने आहले गेट बी खोल्ले जंदे हे पर हून इयां नेई होग ते दौनें मुखें दे जवान परेड दौरान इक दुए कन्नै हत्थ नेई मलांगन ते नां गै मठेयाइएं दा लैन-देन होग।

<><><><><><>

AD-Guns

भारती सेना नै स्वर्ण मंदिर च एयर फिफेंस गन दी तैनाती कन्ने जुड़ी दी खबरें गी खारिज करी दिता ऐ। भारती सेना नै स्पष्ट कीता ऐ जे अमृतसर च श्री दरबार साहिब दे परिसर च कोई बी एयर डिफेंस गन जां कोई होर दुआ डिफेंस साधन तैनात नेई कीते दा ऐ।

<><><><><><>

Cabinet

इक्क महत्वपूर्ण विकास तैहत मध्य प्रदेश मंत्रिमंडल नै महानगर खेतर नियोजन ते विकास अधिनियम गी मंजूरी देई दिती ऐ जेदे कन्ने दो प्रमुख शहरें भोपाल ते इंदौर गी महानगरीय शहरें दे रूप च विकसित करने दी बत पदरी होई गई ऐ। प्रस्तावित भोपाल महानगर क्षेत्र पंज जिले भोपाल, रायसेन, विदिशा,, सीहोर ते राजगढ़ च फैले दा होग जदके इंदौर महानगर क्षेत्र च इंदौर, उज्जैन, देवास ते थार जिले शामिल होंगन। प्रस्ताव गी मंजूरी मिलने मगरा सरकार हून राज्य च महानगर नियोजन समितियों ते महानगरीय क्षेत्र विकास प्राधिकरण दा गठन करोग।

<><><><><><>

Agri-Minister

केंद्री राई-बाई ते करसान कल्याण मंत्री शिवराज सिंह चौहान होरें आखेआ ऐ जे 2047 तगर भारत गी राई-बाई दे क्षेत्र च बी पूरी चाली विकसित ते आत्मनिर्भर

बनाने लेई इस क्षेत्र दी बरोस दर गी घटोघट्ट 5 प्रतिशत जां एहदे शा उप्पर बनाई रखना बड़ा जरूरी ऐ ते एहदे च राई-बाई कन्नै जुड़े दे होर क्षेत्र बी शामिल न। कल नमीं दिल्ली च मीडिया कन्नै गल्ल करदे होई चौहान होरें आखेआ जे राई-बाई क्षेत्र भारती अर्थ बवस्था दी रीढ़ ऐ ते लोकें दी रोजी रूट्टी दा सब्बनै शा बड़डा जरिया ऐ।

<><><><><><>

White

केंद्री सहकारिता मंत्री होरें आखेआ ऐ जे श्वेत क्रांति दे दुए गेढ़ तैहत सहकारी डेयरी क्षेत्र च टिकाउ विकास ते संचालिक अर्थ बवस्था गी यकीनी बनाना लोड़चदा ऐ। उनें एह गल्ल नमीं दिल्ली च सहकारी डेयरी क्षेत्र च स्थिरता ते चक्रियता उप्पर इक्क बैठक दी अध्यक्षता करदे होई गलाई। उनें आखेआ जेकर करसानें दी औंदन बधानी ऐ ते इकीकृत सहकारी समितियें दा इक्क नेआ नेटवर्क बनाने दी लोड़ ऐ जित्थे मते सारे कम्म सहकारी समितियें दे बश्कार आपसी सहयोग कन्नै होन।

<><><><><><>

Turmp-Golden Dome

अमरीका दे राष्ट्रपति डोनाल्ड ट्रम्प होरें अपने मुखे लेइ 175 अरब डालर दे गोल्डन डोम मिसाइल रक्षा सिस्टम दी घोषणा कीती ऐ। सुरक्षा दे लिहाज कन्नै मते महत्वै आहले इस कार्यक्रम दी शुरूआत चीन ते रूस कोला अमरीका गी

होई सकने आहले खतरे गी खत्म करने लेई कीती जा करदी ऐ। अमरीकी अंतरिक्ष बल दे जनरल माइकेल गुएटलीन होरें गी एहदे प्रमुख दे तौरा पर नियुक्त कीता गेआ ऐ। व्हाइट हाउस च राष्ट्रपति ट्रम्प होरें इस बारै च गल्ल करदे होई आखेआ जे गोल्डन डोम लम्मे छिंडे पर मार करने आहली मिसाइलें कोला अमरीका दी रक्षा करोग।

<><><><><><>

Shooting

निशानेबाजी च एड्रियन कर्माकर होरें कल जर्मनी च आयोजित आई.एस.एस.एफ जूनियर वर्ल्ड कप च 50 मीटर राइफल प्रोन स्वर्धा च चांदी दा तगमा जितेआ। ओह स्वीडन दे जेस्पर जीहानसन थमां छड़ो 0 इशारिया 3 अंक पिच्दे रेय, जिनें सुन्ने दा तगमा जितेआ हा। एड्रियन दे प्रदर्शन नै इस प्रतियोगिता च जूनियर वर्ग दा नमां राष्ट्रीय रिकार्ड कायम कीता ऐ।

<><><><><><>

IPL

आई.पी.एल क्रिकेट च राजस्थान रायल्स नै जंदी रातीं अरूण जेटली स्टेडियम च चेन्नई सुपर किंग्स गी 6 विकेटें कन्नै हराई दिता। 188 रन्जें दा पिच्छा करन उतरी दी राजस्थान रायल्स दी टीम नै छड़े 17 ओवरें ते 1 गेंद च एह मैच

अपने ना करी लैता। अज्ज संझा साङ्के सत बजे दिल्ली कैपिटल्स ते मुम्बई इंडियन्स बश्कार मैच खेड्ोआ जाग।

<><><><><><>

PM-MKB

प्रधानमंत्री नरेन्द्र मोदी होर इस म्हीने दे अखीरले एतवारें यानि 25 मेई गी आकाशवाणी पर प्रसारित होने आहले अपने महावार रेडियो कार्यक्रम मन की बात राए देश विदेश च रोहने आहले लोकें कन्ने अपने विचार सांझा करडन। एह इस प्रोग्राम दी 122मीं कड़ी होग। लोक अपने विचार ते सुझा टोल फ्री नम्बर 800-11-7800 पर भेजी सकदे न। एदे अलावा लोक अपने सुझा ते विचार नरेन्द्र मोदी एप ते माई गोव ओपन फोर्म पर बी भेजी सकदे न। इन्दे च चुने गेदे किश सुझाएं गी प्रधानमंत्री होरें अपने कार्यक्रम च शामिल करडन। अपने विचार ते सुझा भेजेने दी अखीरी तरीक 23 मेई ऐ।

<><><><><><>